

**Najib Harap Keluarga Mangsa MH17 Kekal Tabah**  
**Bernama**  
**Sept 2, 2014**

KUALA LUMPUR, 2 Sept (Bernama) -- Perdana Menteri Datuk Seri Najib Tun Razak berharap keluarga mangsa pesawat MH17 yang menerima jenazah orang tersayang mereka hari ini supaya kekal tabah.

"Saya berdoa agar keluarga mangsa MH17 yang berada di sini hari ini untuk menerima orang tersayang mereka agar kekal tabah dalam saat sedih ini," katanya dalam Tweet terbaharu beliau.

Mayat sembilan mangsa pesawat itu - tujuh rakyat Malaysia dan dua warga Belanda diberi penghormatan penuh setibanya di Kompleks Bunga Raya, Lapangan Terbang Antarabangsa KL (KLIA) hari ini dari Amsterdam.

Pada 22 Ogos lalu, kumpulan pertama 20 jenazah termasuk 11 penumpang dan sembilan anak kapal dibawa balik dengan penerbangan khas pesawat Malaysia Airlines.

Jenazah empat lagi mangsa dibawa balik pada 23 dan 24 Ogos.

Pesawat Boeing 777-200 yang membawa 283 penumpang dan 15 anak kapal dalam perjalanan ke Kuala Lumpur dari Amsterdam apabila ia ditembak jatuh di timur Ukraine pada 17 Julai.

-- BERNAMA

Copyright © 2014 BERNAMA

Source :<http://www.bernama.com/bernama/v7/bm/newsindex.php?id=1065172>